

PRAVILNIK

O POSTUPKU PODNOŠENJA POREZNIH PRIJAVA

("Službene novine Federacije BiH", broj
66/02, 54/03, 74/04, 38/09, 7/11, 53/12 i 87/20)

- Prečišćena naslužbena verzija –

I - OPĆE ODREDBE

Član 1.

Ovim pravilnikom propisuje se postupak podnošenja poreznih prijava koje je porezni obveznik dužan podnositi Poreznoj upravi Federacije Bosne i Hercegovine (u daljnjem tekstu: Porezna uprava), a koji je propisan Zakonom o Poreznoj upravi Federacije Bosne i Hercegovine ("Službene novine Federacije BiH", broj 33/02, 38/04, 57/09, 40/10, 27/12, 7/13, 71/14 i 91/15 - u daljnjem tekstu: Zakon), drugim poreznim zakonima i podzakonskim aktima, te razloge, način i postupak podnošenja i rješavanja zahtjeva za produženje roka za podnošenje poreznih prijava.

Član 2.

Vrste poreznih prijava čije se podnošenje regulira ovim pravilnikom su:

- porezne prijave koje podnosi porezni obveznik u skladu sa poreznim zakonima,
- izmijenjene porezne prijave,
- prijave koje Porezna uprava podnosi u ime poreznog obveznika,
- obavijesne prijave,
- prijave poreza po odbitku.

Porezne prijave koje su porezni obveznici dužni dostavljati u skladu sa poreznim zakonima sastavni su dio pravilnika o primjeni kojima je uređeno provođenje Zakona o porezu na dobit ("Službene novine Federacije BiH", br. 15/16 i 15/20), Zakona o porezu na dohodak ("Službene novine Federacije BiH", br. 10/08, 9/10, 44/11, 7/13 i 65/13), Zakona o doprinosima ("Službene novine Federacije BiH", br. 35/98, 54/00, 16/01, 37/01, 1/02, 17/06, 14/08, 91/15, 104/16, 34/18 i 99/19) kao i odredbi propisa kantona koji uređuju oporezivanje imovine, nepokretnosti, poklona i naslijeđa.

Član 3.

Porezna uprava je dužna osigurati obrasce poreznih prijava za sve vrste poreza u obliku elektronskih formulara na svojoj Internet stranici

i omogućiti njihovo besplatno printanje poreznim obveznicima.

Član 4.

Obrada poreznih prijava vrši se u mjerodavnim ispostavama Porezne uprave, osim ako direktor Porezne uprave (u daljnjem tekstu: direktor) ne odluči drugačije.

II - POREZNE PRIJAVE KOJE PODNOSE POREZNI OBVEZNICI

Član 5.

Porezna prijava je prijava porezne obaveze koju je porezni obveznik dužan podnijeti Poreznoj upravi, a koja se sastoji od izvještaja i drugih relevantnih dokumenata, te iznosa porezne obaveze koju je utvrdio sam porezni obveznik, a koja se podnosi na propisanom obrascu porezne prijave u elektronskoj ili papirnoj formi.

Prijave koje su podnesene elektronskim putem potpisuju se u skladu sa Zakonom o elektronskom potpisu ("Službeni glasnik BiH", broj 91/06).

Poreznom prijavom poreza na dohodak u smislu stava (1) ovog člana smatra se Godišnja prijava poreza na dohodak (Obrazac GPD-1051).

Poreznom prijavom poreza na dobit u smislu stava (1) ovog člana smatra se:

- a) Prijava poreza na dobit za privredna društva (Obrazac PP 801),
- b) Prijava poreza na dobit za podružnicu RS ili BD (Obrazac PP-802),
- c) Prijava poreza na dobit za poslovnu jedinicu nerezidenta (Obrazac PP-803),
- d) Prijava poreza na dobit za djelimično izuzeta lica (Obrazac PP-804).

Prijavom u smislu stava (1) ovog člana smatra se

- i:
 - a) Specifikacija uz isplatu plaće zaposlenika u radnom odnosu kod pravnih i fizičkih lica sa sjedištem u Federaciji (Obrazac 2001),
 - b) Specifikacija uz isplatu plaće zaposlenika sa prebivalištem u Republici Srpskoj i Brčko Distriktu u radnom odnosu kod pravnih i fizičkih lica sa sjedištem u Federaciji (Obrazac 2001-A),
 - c) Specifikacija uz uplatu doprinosa poduzetnika (Obrazac 2002)."

- d) Specifikacija uz uplatu doprinosa poduzetnika sa prebivalištem u Republici Srpskoj i Brčko Distriktu, koji samostalnu

djelatnost obavljaju na teritoriji Federacije (Obrazac 2002-A).

Član 6.

Pravne osobe, druge organizacije, fizičke osobe - poduzetnici i fizičke osobe - građani dužni su, za sve vrste poreznih obaveza kojima podliježu u skladu poreznim zakonima, podnositi porezne prijave.

Pravne osobe i druge organizacije podnose porezne prijave ispostavi Porezne uprave u čijoj se mjerodavnosti nalazi sjedište te pravne osobe ili druge organizacije odnosno kod koje je to sjedište upisano prilikom njihove registracije i uzimanja identifikacionog broja.

Fizička osoba - preduzetnik podnosi svoju poreznu prijavu ispostavi Porezne uprave u čijoj se mjerodavnosti nalazi mjesto na kojem se obavlja većina njegovih poslovnih aktivnosti odnosno kod koje se ta fizička osoba - preduzetnik upisala prilikom registracije i dobila identifikacioni broj.

Fizičke osobe - građani svoje porezne prijave podnose ispostavi Porezne uprave u čijoj nadležnosti se nalazi mjesto stanovanja te fizičke osobe - građanina prema odredbama zakona, a ako se radi o poreznim obavezama fizičkih osoba - građana u vezi nekretnina, porezne prijave se podnose ispostavi Porezne uprave na čijem području se nalaze te nekretnine.

Ukoliko se prijave podnose elektronskim putem, st. (2) i (3) ovog člana se ne primjenjuju.

Član 7.

Porezne prijave podnose se na jedan od slijedećih načina:

1. ličnom predajom,
2. elektronskim putem i
3. poštom preporučeno.

Član 8.

Porezne prijave moraju biti potpune.

Porezna prijava se smatra potpunom ukoliko sadrži sve podatke iz obrasca porezne prijave potrebne za obradu poreznih prijava u Poreznoj upravi kao i sljedeće podatke:

- identifikacioni broj poreznog obveznika, zastupnika poreznog obveznika i osobe koja je ispunila bilo koji dio porezne prijave i
- potpis (ručni ili elektronski) poreznog obveznika ili osobe ovlaštene da potpisuje u ime poreznog obveznika, zastupnika poreznog

obveznika i osobe koja je ispunilo bilo koji dio porezne prijave.

Predaja poreznih prijava elektronskim putem omogućena je samo onim poreznim obveznicima koji o tom načinu predaje daju odgovarajuću izjavu i prijave svoje uposlenike ovlaštene za komunikaciju sa Poreznom upravom elektronskim putem.

Knjigovodstveni servisi mogu podnositi porezne prijave elektronskim putem za porezne obveznike za koje vrše knjigovodstvene usluge ukoliko je to regulirano ugovorom između knjigovodstvenog servisa i poreznog obveznika.

Obrasci izjave i prijava iz st. 3. i 4. ovog člana nalaze se u prilogu ovog pravilnika i čine njegov sastavni dio.

Porezna uprava neće razmatrati porezne prijave koje su nepotpune i koje zbog toga ne mogu biti procesuirane i takve porezne prijave se vraćaju poreznom obvezniku. U takvim slučajevima smatra se kao da porezni obveznik nije podnio poreznu prijavu, te će se postupati u skladu odredbama poglavlja IV. ovog pravilnika.

Obrasci prijava iz člana 8. st. 3. i 4., zamjenjuju se novim obrascima koji se nalaze u prilogu ovog pravilnika i čine njegov sastavni dio.

Član 9.

Porezne prijave moraju biti podnesene u roku.

Porezna prijava se smatra podnesenom u roku ukoliko je primljena u Poreznoj upravi u roku utvrđenom poreznim zakonima ili odgovarajućim podzakonskim aktima ili u produženom roku odobrenom nakon podnošenja zahtjeva za produženje roka za podnošenje porezne prijave kao i u slučaju kada porezna prijava može biti obrađena u obliku u kojem je podnesena.

Porezna prijava se smatra primljenom od Porezne uprave na dan:

- kada je poslana preporučenom poštom,
- kada je uspješno poslana elektronskim putem,
- kada je poreznu prijavu osobno predao porezni obveznik ili njegov zastupnik.

III - IZMIJENJENE POREZNE PRIJAVE

Član 10.

Izmijenjena porezna prijava je prijava koju porezni obveznik podnosi radi ispravljanja

grešaka ili dopune podataka na prijavi koja je prethodno podnesena.

Izmijenjenu poreznu prijavu porezni obveznik podnosi na istom obrascu na kojem je podnesena porezna prijava koja je predmetom izmjena.

Izmijenjena porezna prijava sadrži podatke kojima se potpuno objašnjavaju razlozi zbog kojih se ranije podnesena porezna prijava mijenja.

Uz izmijenjenu poreznu prijavu porezni obveznik prilaže i dokumente, informacije i izjave koje je prema poreznim zakonima dužan priložiti uz poreznu prijavu koja je predmetom izmjena.

Porezni obveznik je dužan na izmijenjenu poreznu prijavu staviti naznaku da se radi o izmijenjenoj poreznoj prijavi.

Izmijenjena porezna prijava se podnosi odmah, a najkasnije u roku od petnaest (15) dana od dana kada porezni obveznik otkrije da se moraju izmijeniti podaci na prijavi koja je ranije podnesena, a naročito ako se otkrije da iznos porezne obaveze iskazan u poreznoj prijavi nije tačan.

Izmijenjena porezna prijava podnosi se isto ispostavi Porezne uprave kojoj je podnesena i porezna prijava koja je predmetom izmjena. Izmijenjena porezna prijava se može podnijeti samo jednom u toku obračunskog razdoblja za koje se podnosi porezna prijava.

Odredbe ovog člana se ne primjenjuju ukoliko je drugačije propisano poreznim zakonima i podzakonskim aktima.

Član 11.

Ako porezni obveznik izmijenjenu poreznu prijavu podnosi nakon prijema obavijesti Porezne uprave da je u ranije podnesenoj poreznoj prijavi napravljena greška ili propust, tada izmijenjenu poreznu prijavu porezni obveznik mora podnijeti u skladu instrukcijama navedenim u obavijesti.

IV - PRIJAVE KOJE PODNOSI POREZNA UPRAVA U IME POREZNOG OBVEZNIKA

Član 12.

Porezna prijava koju podnosi Porezna uprava je prijava koju ovlaštenu radnik Porezne uprave

sačinjava i podnosi u ime poreznog obveznika za poreznu obavezu za koju sam porezni obveznik nije u zakonom propisanom roku podnio poreznu prijavu.

Porezna prijava koju podnosi Porezna uprava sačinjava se i podnosi na istom obrascu kao i porezna prijava koju podnosi sam porezni obveznik, ali sa tom razlikom da na ovoj prijavi treba da stoji naznaka da se radi o poreznoj prijavi koju podnosi Porezna uprava u ime poreznog obveznika i pouka o pravnom lijeku u skladu sa članom 76. Zakona.

Član 13.

Kod pripreme i sačinjavanja porezne prijave koju podnosi u ime poreznog obveznika, radnik Porezne uprave dužan je da razmotri i uzme u obzir sve raspoložive informacije, uključujući i ranije porezne prijave koje je podnosio porezni obveznik, informacije trećih osoba, izvršene uplate i sve druge informacije koje mogu biti od koristi za utvrđivanje tačne porezne obaveze.

Član 14.

Ovlašteni radnik Porezne uprave može poreznu prijavu u ime poreznog obveznika podnijeti po isteku petnaest (15) dana od dana kada je poreznom obvezniku za podnošenje porezne prijave istekao rok propisan poreznim zakonima i odgovarajućim podzakonskim aktima, a u kojem porezni obveznik nije sam podnio poreznu prijavu.

Član 15.

Popunjena Godišnja prijava poreza na dohodak (Obrazac GPD-1051) i dostavljena poreznom obvezniku od strane Porezne uprave na osnovu prijave poreza po odbitku poreza na dohodak iz člana 20. stav (2) ovog pravilnika, ne smatra se prijavom koju podnosi Porezna uprava u ime poreznog obveznika.

Član 16.

(brisan)

Član 17.

(brisan)

Član 18.

(brisan)

Član 19.

Izvršna rješenja iz člana 78. Zakona kojima se utvrđuje dodatna porezna obaveza, imaju karakter porezne prijave.

Za obaveze utvrđene rješenjima iz stava (1) ovog člana, porezni obveznik nije dužan dostavljati izmijenjene porezne prijave.

Ovlašteni zaposlenik Porezne uprave dužan je po rješenjima iz stava (1) ovog člana, sačiniti izmijenjene porezne prijave i pripadajuće izvještaje, i iste unijeti u IT sistem Porezne uprave.

IVa - OBAVIJESNE PRIJAVE

Član 19a.

Obavijesne prijave su pisana izvješća koja je isplatitelj sredstava dužan podnositi Poreznoj upravi na obrascima propisanim podzakonskim aktima, a koji sadrže podatke o financijskim transakcijama, obračunatim, obustavljenim i uplaćenim doprinosima, porezima i posebnim naknadama kojima te transakcije podliježu.

Obavijesna prijava poreza na dohodak u smislu stava (1) ovog člana, smatra se:

- a) Godišnji izvještaj o ukupno isplaćenim plaćama i drugim ličnim primanjima (Obrazac GIP-1022),
- b) Godišnja prijava dohotka od zajedničkog obavljanja samostalne djelatnosti (Obrazac GPZ-1052),
- c) Specifikacija za utvrđivanje dohotka od samostalne djelatnosti (Obrazac SPR-1053),
- d) Pregled prihoda i rashoda od iznajmljivanja nepokretne imovine (Obrazac PRIM-1054).

Obavijesna prijava poreza na dobit u smislu stava (1) ovog člana, smatra se:

- a) Porezni bilans (Obrazac PB 800-A),
- b) Porezni bilans (Obrazac PB 800-B),
- c) Plan investiranja (Obrazac PI-808),
- d) Pregled nastalih, neiskorištenih i iskorištenih poreznih gubitaka (Obrazac PG-809),
- e) Prijava porezne olakšice po osnovu investiranja u proizvodnu opremu (Obrazac PP-810),
- f) Prijava porezne olakšice po osnovu investiranja u stalna sredstva (Obrazac PP-811),
- g) Prijava porezne olakšice po osnovu novog zapošljavanja (Obrazac PP-812),
- h) Izjava o obračunatom porezu na isplaćene dividende/udjele (Obrazac ID-813),
- i) Izjava pravnog lica u svrhu oslobađanja plaćanja poreza po odbitku na izvoru (Obrazac OP-820).

Prijave iz st. (2) i (3) ovog člana dostavljaju se Poreznoj upravi na način i u rokovima utvrđenim poreznim zakonima i podzakonskim aktima."

Član 19c.

Poslodavac odnosno lice koje, u smislu odredbi Zakona o porezu na dohodak, ima obaveze poslodavca - isplatioca plaća, dužan je do kraja februara tekuće godine za proteklu godinu dostaviti svakom zaposleniku obavijesnu prijavu iz člana 19a. stav (2) tačka a) ovog pravilnika nakon uplaćene akontacije poreza na dohodak ostvarene po osnovu nesamostalne djelatnosti i obustavljenim i uplaćenim obaveznim doprinosima iz osnovice

Član 19d.

Obavijesnom prijavom smatra se i razmjena informacija između Porezne uprave i drugih poreznih administracija o obavezi obustave i uplate obaveznih doprinosa i akontacija poreza na dohodak.

V - PRIJAVE POREZA PO ODBITKU

Član 20.

Prijava poreza po odbitku je izvješće koje je pravna osoba, druga organizacija ili fizička osoba - preduzetnik dužna podnijeti Poreznoj upravi, a u kojem se daju informacije o porezima i doprinosima koji su od strane druge osobe obustavljeni i uplaćeni na odgovarajuće račune za uplatu javnih prihoda.

Prijavom poreza po odbitku poreza na dohodak u smislu stava (1) ovog člana, smatra se:

- a) Mjesečni izvještaj o isplaćenim plaćama, ostvarenim koristima i drugim oporezivim prihodima zaposlenika od nesamostalne djelatnosti, plaćenim doprinosima i akontaciji poreza na dohodak (Obrazac MIP-1023),
- b) Pojedinačni mjesečni izvještaj o isplaćenim plaćama, obračunatim i uplaćenim doprinosima i porezu na dohodak od nesamostalne djelatnosti (Obrazac PMIP-1024),
- c) Akontacija poreza po odbitku za povremene samostalne djelatnosti (Obrazac AUG-1031),
- d) Akontacija poreza po odbitku na prihode od drugih samostalnih djelatnosti (Obrazac ASD-1032),
- e) Prijava poreza na dohodak od ulaganja kapitala, dobitke nagradnih igara i igara na sreću i porez po odbitku nerezidenata na prihode od povremenog obavljanja samostalne djelatnosti (Obrazac PDN-1033),
- f) Prijava poreza na prihod od imovine i imovinskih prava (Obrazac PIP-1034),

- g) Akontacija poreza po odbitku na druge samostalne djelatnosti na prihod iz inostranstva (Obrazac AMS-1035),
h) Akontacija poreza po odbitku rezidenta (Obrazac APR 1036).

Prijavom poreza po odbitku poreza na dobit u smislu stava (1) ovog člana, smatra se:
a) Prijava poreza po odbitku po osnovu dividende (Obrazac POD-815),
b) Prijava poreza po odbitku po osnovu kamate (Obrazac POD-816),
c) Prijava poreza po odbitku po osnovu autorske naknade (Obrazac POD-817),
d) Prijava poreza po odbitku po osnovu ostalih prihoda (Obrazac POD-818) i
e) Prijava poreza po odbitku po osnovu imovine i prava (Obrazac POD-819).

Prijave iz st. (2) i (3) ovog člana dostavljaju se Poreznoj upravi na način i u rokovima utvrđenim poreznim zakonima i podzakonskim aktima.

Član 21.

(brisan)

Član 22.

(brisan)

VI - PRODUŽENJE ROKA ZA PODNOŠENJE POREZNIH PRIJAVA

Član 23.

Zahtjev za produženje roka za podnošenje porezne prijave je pisani zahtjev koji se podnosi nadležnoj ispostavi Porezne uprave radi traženja odobrenja za podnošenje porezne prijave nakon roka propisanog poreznim zakonima i odgovarajućim podzakonskim aktima.

Član 24.

Porezni obveznik podnosi pismeni zahtjev za produženje roka za podnošenja porezne prijave ispostavi Porezne uprave prije isteka roka za podnošenje porezne prijave. U suprotnom, zahtjev neće biti razmatran.

Član 25.

Porezni obveznik je dužan u zahtjevu za produženje roka za podnošenje porezne prijave navesti valjane razloge zbog kojih podnosi zahtjev kao i slijedeće podatke:

- ime/naziv poreznog obveznika,
- adresu poreznog obveznika,

- identifikacioni broj poreznog obveznika,
- vrstu poreza,
- porezno razdoblje i
- sve druge podatke koji su potrebni djelatniku Porezne uprave koji rješava po zahtjevu.

Valjanim razlozima za podnošenje zahtjeva mogu se smatrati:

- bolest,
- odsustvo iz zemlje,
- prirodne nesreće,
- vremenske nepogode,
- uništenje ili oštećenje poslovnih knjiga i evidencija prilikom požara, poplava i sl.,
- smrt osobe ovlaštene za sačinjavanje i podnošenje porezne prijave, ili
- drugi valjani razlozi koji su poreznog obveznika spriječili da u roku podnese poreznu prijavu.

Kod rješavanja zahtjeva, ovlašteni radnik Porezne uprave može uzeti u obzir i raniji odnos poreznog obveznika prema izvršavanju poreznih obaveza.

Ovlašteni radnik Porezne uprave može zahtijevati od poreznog obveznika da dostavi dokaze o razlozima navedenim u zahtjevu za produženje roka za podnošenje porezne prijave.

Član 26.

Direktor ili radnik Porezne uprave kojeg on ovlasti može odobriti produženje roka za podnošenje porezne prijave. Odobrenje ovakvog zahtjeva produžava rok za podnošenje porezne prijave i ne utiče na rok za plaćanje porezne obaveze niti ga produžava.

Ukoliko porezni obveznik podnese poreznu prijavu sa svim podacima potrebnim za obradu prijave u produženom roku, Porezna uprava neće protiv poreznog obveznika podnositi zahtjev za pokretanje prekršajnog postupka zbog zakašnjelog podnošenja porezne prijave.

Član 27.

U slučaju odobrenja zahtjeva, rok za podnošenje porezne prijave se može produžiti za najviše šezdeset (60) dana.

Član 28.

Porezni obveznik mora biti u pismenom obliku obaviješten da li je njegov zahtjev za produženje roka za podnošenje porezne prijave odobren ili ne.

VII - PRIJELAZNE I ZAVRŠNE ODREDBE

Član 29.

(brisan)

Član 30.

(brisan)

Član 31.

(brisan)

Član 32.

(brisan)

Član 33.

Ovaj pravilnik stupa na snagu narednog dana od dana objavljivanja u "Službenim novinama Federacije BiH", a primjenjuje se od 01.01.2021. godine.

Broj 05-02-2-8157/20-1
Novembar 2020. godine
Sarajevo

Ministrica
Jelka Milićević, s. r.